

Meeqqanut, Naligiissitaanermut, Akuliutitaanermut  
Isumaginninnermullu Ministereqarfik  
Ilaqutariit Inatsiseqartitaanerit pillugu Allaffeqarfik  
J.nr. 2012-5209 / 1th  
16. december 2014

## MISSILIUUT

### **Meeqqat illersorneqarnissaannik nunat tamat Haagimi isumaqatigiissutaat pillugu inatsisip Kalaallit Nunaanni atuutilersinneqarnissaanik peqqussut**

UAGUT MARGRETHE AAPPAAT, Guutip saammaanneragut Danmarkip Dronningia,  
nalunaarpugut:

Meeqqat illersorneqarnissaannik nunat tamat Haagimi isumaqatigiissutaat pillugu inatsimmi nr. 434, 8. maj 2006-imeersumi § 16, imm. 2,<sup>1</sup> naapertorlugu aalajangiunneqarpoq inatsit imatut oqaasertaqartillugu Kalaallit Nunaanni atuutilersinneqassasoq:

**§ 1.** Angajoqqaat akisussaassuseqarnerannut meeqqallu illersorneqarnissaannut suliniutinut (meeqqat illersorneqarnissaat pillugu nunat tamat Haagimi isumaqatigiissutaannut) tunngatillugu pisinnaasat, inatsisinik toqqaasarnerit, akuersisarneq, naammassinnittarneq suleqatigiinnerlu pillugit nunat tamat Haagimi isumaqatigiissutaanni 19. oktober 1996-imeersumi aalajangersakkat Kalaallit Nunaanni atuupput.

*Imm. 2.* Nunat tamat isumaqatigiissutaata qallunaatuunngortinneqarnera inatsimmut ilanngussatut ilanngunneqarpoq.

*Imm. 3.* Nunat tamat isumaqatigiissutaanni aalajangersakkat atuutsinneqassanngillat malittarisassat immikkut ittut inatsisini allani aalajangersarneqarsimatillugit.

*Imm. 4.* Nunat tamat isumaqatigiissutaanni aalajangersakkat Kalaallit Nunaata Savalimmiullu aamma Kalaallit Nunaata Danmarkillu akornanni pissutsinut atuutsinneqassanngillat.

*Stk. 5.* Nunat tamat isumaqatigiissutaanni allannguutit pillugit isumaqatigiissutini peqqussut tamakkiisumik ilaannaasumilluunniit atuutsinneqassasoq isumaginninnermut, meeqqanut akuliutitaanermullu ministerip aalajangersinnaavaa.

#### *Qitiusumik oqartussat*

**§ 2.** Isumaginninnermut, meeqqanut akuliutitaanermullu ministeri qitiusumik oqartussaasussanik toqqaassaaq, tak. nunat tamat isumaqatigiissutaanni aalajangersagaq 29 aamma qitiusumik oqartussat suliaasaat malittarisassiuussinnaallugit kiisalu tamatumunnga naalakkersuisoq

---

<sup>1</sup> Aalajangersagaq imatut oqaasertaqarpoq: ”Inatsimmi §§ 1-8, 13 aamma 14 kunngip peqqussutaatigut Savalimmiuni Kalaallillu Nunaanni pissutsit immikkut ittut allaassutigitaat allaassutigitillugit Savalammiumi Kalaallillu Nunaanni tamakkiisumik ilaannarmilluunniit atuutilersinneqarsinnaapput.”

ministeriluunniit oqaloqatigereerlugit taassuma suliassaasa ilaat oqartussanut allanut tunniussinnaallugit.

*Nunat tamat isumaqatigiissutaat malillugu eqqartuussiviit sulianik suliarinnittarnerat*

§ 3. Aalajangiineq tunngavigalugu nunat tamat isumaqatigiissutaanni aalajangersagaq 8 aamma 9 malillugit pisinnaasat allamut nuunneqarnissaannik eqqartuussiviup aalajangiussinera aalajangiunneqassaaq. Kalaallit Nunaanni eqqartuussisarneq pillugu inatsimmi kapitali 43-mi malittarisassat malillugit aalajangiineq suliassanngorteqqinneqarsinnaavoq.

§ 4. Suliniutip akuersarneqarnissaa akuersarneqannginnissaaluunniit pillugu nunat tamat isumaqatigiissutaanni aalajangersagaq 24 malillugu qinnuteqaatit Kalaallit Nunaanni Eqqartuussivimmut tunniunneqassapput. Meeraq imaluunniit meeraq sinnerlugu akuerisaasoq akuerisaanngitsorluunniit (suliami pineqartoq) imaluunniit akuerineqarnissamik akuerineqannginnissamilluunniit qinnuteqaateqartoq (suliarinneqqusisoq), Kalaallit Nunaanni eqqartuussivinni suliarineqarsinnaanngippat, qinnuteqaat Danmarkimi oqartussaaitanut tunniunneqassaaq.

§ 5. Suliniut nunami maani pinngitsaaliissummik suliarineqarsinnaasutut nalunaarutigineqarnissaanik nunat tamat isumaqatigiissutaanni aalajangersagaq 26 malillugu qinnuteqaatit Kalaallit Nunaanni Eqqartuussivimmut tunniunneqassapput, meeraq Kalaallit Nunaanni najugaqarpat imaluunniit Kalaallit Nunaanni pinngitsaaliissummik naammassinnittoqassappat.

*Imm. 2.* Kalaallit Nunaanni Eqqartuussivik isumaqarpat suliami pineqartoq imaluunniit suliarinneqqusisoq inatsisilerinikkut ikiorteqartinnagu suliaq isumannaatsumik suliarineqarsinnaanngitsoq, eqqartuussivik pineqartunut inatsisilerituumik ikiorteqartitsisinnaavoq. Kalaallit Nunaanni eqqartuussisarneq pillugu inatsimmi § 254, imm. 1, nr. 3, tak. imm. 3-mi piumasagaatit illuatungiusup naammassisinnaanngippagit, inatsisilerituumik ikiorteqartitsinermut aningaasartuutit eqqartuussiviup illuatungiusumut naalagaaffiup karsianut taarsiissutigeqqusinnaavai. Taamatuttaaq angajoqqaatut oqartussaassuseq pillugu aalajangiinerit il.il. (nunani tamalaani meeqqanik aallarussisarnerit) nunani tamalaani naammassinnittarneq pillugu inatsimmi § 18 a malinneqassaaq.

*Imm. 3.* Imm. 1 malillugu suliniutit pinngitsaaliissummik suliarineqarsinnaasutut nalunaarutigineqartut naammassineqarnissannik suliat, Kalaallit Nunaanni eqqartuussisarneq pillugu inatsimmi kapitali 46-47 malillugu suliarineqassapput.

§ 6. § 4 imaluunniit § 5 malillugu qinnuteqaat allagaassaaq suliniutillu qinnutigineqartup allanngortinneqarneranik ilaqartinneqassalluni. Allaganngortitap kalaallisut qallunaatulluunniit nutserneqarnera uppersagaassasoq Kalaallit Nunaanni Eqqartuussiviup piumasarisinnaavaa.

*Imm. 2.* (Kalaallit Nunaanni atuutilersinneqassanngilaq).

*Imm. 3.* Qinnutigineqartup akuersarneqarsinnaanera tunngavilersorlugu Kalaallit Nunaanni Eqqartuussiviup aalajangiutissavaa. Aalajangigaq Kalaallit Nunaanni eqqartuussisarneq pillugu inatsimmi kapitali 43-mi malittarisassat malillugit suliassanngorteqqinneqarsinnaavoq.

*Atuutilersitsineq*

§ 7. Peqqussut atuutilersinneqarpoq ulloq 1. janur 2016.

§ 8. Meeqqat illersorneqarnissaat pillugu nunat tamat Haagimi isumaqatigiissutaat pillugu inatsit naapertorlugu inatsisiliat Kalaallit Nunaanni atuutsinneqanngillat.